

Benar Membawa Kebaikan

Daripada Abdullah bin Mas'ud RA bahwa Rasulullah SAW bersabda:

إِنَّ الصَّدْقَ يَهْدِي إِلَى الْبِرِّ، وَإِنَّ الْبِرَّ يَهْدِي إِلَى الْجَنَّةِ، وَإِنَّ الرَّجُلَ لَيَصْدُقُ، حَتَّى يُكْتَبَ عِنْدَ اللَّهِ صِدِّيقًا

Maksudnya: “*Sesungguhnya benar membawa kepada kebaikan dan kebaikan membawa kepada syurga, dan sesungguhnya seorang yang sentiasa bersikap benar akan ditulis di sisi Allah sebagai ahli yang benar.*”

Riwayat al-Bukhari dalam *al-Sahih* (10/507) no. (6094) dan Muslim dalam *al-Sahih* (4/2012-2013) no. (2607)

Pedoman dan Iktibar Hadis

Antaranya:

1. Benar merupakan sifat yang mulia dan menjadi sifat wajib bagi Rasulullah. Begitu juga dikurniakan balasan yang baik bagi siapa yang melazimi kebenaran. Mereka digelar sebagai *al-Siddiqin*. Benar ini dibahagikan kepada tiga:

- ii. Benar hati dan iktikad.
- iii. Benar perbuatannya.
- iv. Benar perkataannya.

5. Sejarah membuktikan Rasulullah SAW telah melahirkan generasi atau sahabat yang bersifat dengan benar. Hal ini dijelaskan dalam banyak nas daripada al-

Quran. Mereka sanggup melakukan apa sahaja berdasarkan keyakinan dan kebenaran yang mereka imani dan yakin.

6. Benar yang pertama adalah yang paling sukar diikuti dengan yang kedua. Ini kerana hati yang merupakan raja kepada badan begitu mudah terpengaruh dan menerima sebarang anasir sama ada dari pengaruh syaitan atau nafsu. Justeru, hendaklah kita melazimi sifat benar supaya kehidupan menjadi lebih harmoni.
7. Para sufi menganggap sifat *siddiq* adalah pintu masuk pertama untuk melangkah ke alam ketuhanan. Dengan melalui pintu *siddiq* ini telah ramai murid sampai kepada hakikat makrifah. Ini bukanlah sesuatu yang ganjil, ini kerana pada sifat *al-Siddiq* terhimpun segala kemuliaan dan kelebihan, antaranya di sinilah lahirnya segala akhlak-akhlak yang terpuji. Sesungguhnya Allah telah merakamkan pujian kepada golongan *siddiqin* kerana teguhnya janji dengan Allah, di dalam firman-Nya:

مِّنَ الْمُؤْمِنِينَ رِجَالٌ صَدَقُوا مَا عَاهَدُوا اللَّهَ عَلَيْهِ فَمِنْهُمْ مَّن قَضَىٰ نَجْبَهُ وَمِنْهُمْ مَّن يَنْظُرُ وَمَا بَدَّلُوا تَبْدِيلًا

Maksudnya: Di antara orang-orang yang beriman itu ada orang-orang yang bersikap benar, menunaikan apa yang telah dijanjikan kepada Allah (untuk berjuang membela Islam), maka di antara mereka ada yang telah selesai menjalankan janjinya itu (lalu mati syahid), dan di antaranya ada yang menunggu giliran, dan mereka pula tidak mengubah (apa yang mereka janjikan itu) sedikitpun.

(Surah al-Ahzab: 23)

8. Benar dalam percakapan, janji, perbuatan atau tindakan dalam perkhidmatan atau tugas amat diperlukan. Ini kerana benar boleh merungkai banyak kemelut kehidupan. Bukan itu sahaja tetapi dapat menenangkan hati-hati manusia. Dengan itu juga, masyarakat akan dapat hidup aman damai, keadilan dapat ditegakkan dan *haq* dapat dipertahankan. Benar juga menjadikan manusia mempunyai maruah dan jati diri.
9. Dalam realiti kehidupan, kadang-kadang kebenaran cukup pahit untuk dikemukakan apatah lagi boleh membawa kecaman dan pelbagai celaan, tetapi sebaliknya ia berkesudahan dengan kejayaan dan kemenangan. Justeru, sewajarnya kita hiasi sifat benar dalam semua acara kehidupan kita, sama ada sebagai suami, isteri, anak, pekerja, majikan dan lain-lain.



Mutiara Hikmah

- ❖ Abu Laith al-Samarqandi Rahimahullah berkata: Nabi SAW telah menyimpulkan semua kebaikan dalam enam perkara:
 - Berkata benar, meliputi ucapan tauhid, iaitu benar-benar setelah mengucapkan kalimah لا إله إلا الله , benar terhadap Allah SWT dan juga terhadap manusia.
 - Menepati janji baik terhadap Allah atau terhadap sesama manusia iaitu janji taat sampai ke akhir hayat kepada Allah dan baik kepada sesama manusia.
 - Menunaikan amanat. Amanat daripada Allah SWT berupa kewajipan-kewajipan yang diwajibkan ke atas semua hamba, dan amanat daripada sesama manusia, iaitu perkataan atau anak atau harta atau kehormatan.
 - Menjaga kemaluan daripada semua yang syubhat dan haram, memeliharanya dan jangan terlihat oleh orang lain. Ini kerana Nabi SAW telah mengutuk orang yang melihat dan yang dilihat.
 - Pejamkan matamu daripada melihat aurat sesama manusia atau kecantikan wanita yang haram dilihatnya, dan jangan tamakkan dunia.
 - Jagalah tanganmu daripada segala perbuatan yang haram, baik berupa harta atau lain-lainnya.

Pujangga berkata: Kebenaran itu adalah senjata yang paling ampuh, pasti dizahirkan kesudahannya.

Kisah Teladan

Para ahli tafsir dan ahli sejarah mengatakan: Qarun datang dengan peti yang sangat besar. Lalu dia berkata kepada seorang perempuan pezina: Apabila manusia telah berkumpul dan Musa AS berdiri memberikan ceramah, berdirilah kamu dan menangislah, robek-robeklah pakaianmu, kusut masaikanlah rambutmu dan bersumpahlah bahawa Musa telah berzina denganmu.

Manusia pun berkumpul dan Nabi Musa AS mulai menyampaikan ceramahnya tentang tauhid dan keimanan. Dan Qarun hendak membenamkan dakwah Musa AS ke dalam bumi hingga manusia tiada yang percaya dengannya lagi dan membenarkannya. Allah SWT berfirman:

يُرِيدُونَ أَن يُطْفِئُوا نُورَ اللَّهِ بِأَفْوَاهِهِمْ وَيَأْبَى اللَّهُ إِلَّا أَن يُتِمَّ نُورَهُ وَلَوْ كَرِهَ الْكَافِرُونَ

Maksudnya: Mereka berkehendak memadamkan cahaya (agama) Allah dengan mulut (ucapan-ucapan) mereka, dan Allah menghendaki selain menyempurnakan cahaya-Nya, walaupun orang-orang yang kafir tidak menyukai.

(Surah al-Taubah: 32)

Ini kerana cahaya itu adalah cahaya Allah, ajaran itu ajaran Allah, risalah itu risalah Allah, dan Rasul adalah Rasul Allah.

Ketika Nabi Musa AS sedang berdiri dan berpidato, tiba-tiba terdengarlah suaran tangisan seorang perempuan sambil mencakar-cakar mukanya. Maka bermulalah sebuah konspirasi yang sangat jahat dan jijik, iaitu pembohongan yang dibuat oleh orang-orang yang dengki terhadap Islam, terhadap para ulama dan terhadap para daienya.

Nabi Musa AS berhenti dan terdiam, lalu dia menoleh ke arah perempuan itu, baginda pun merasa gugup untuk berbicara dan menangis. Nabi Musa AS yang diutus Allah dengan risalah-Nya, mungkinkah melakukan perbuatan yang keji itu? Musa AS pun berhenti menangis, tetapi baginda tetap tabah dan mengetahui bahawa ini semua adalah ujian.

Baginda pun mengangkat tongkatnya dan berdiri di hadapan perempuan tersebut dan bertanya: Aku ingin bertanya kepadamu, dengan nama Allah Zat yang memecah-belahkan laut untukku. Apakah benar aku melakukan perbuatan tersebut (zina)? Perempuan itu menjawab: Tidak. Kemudian perempuan itu menjelaskan perkara yang sebenarnya. Firman Allah SWT:

يٰۤاَيُّهَا الَّذِيْنَ ءَامَنُوْا لَا تَكُوْنُوْا كَالَّذِيْنَ ءَادَوْا مُوسٰى فَبَرَّاهُ اللّٰهُ مِمَّا قَالُوْٓا۟ وَكَانَ عِنْدَ اللّٰهِ
وَجِيْهًا

Maksudnya: Hai orang-orang yang beriman, janganlah kamu menjadi seperti orang-orang yang menyakiti Musa, maka Allah membersihkannya daripada tuduhan-tuduhan yang mereka katakan. Dan adalah dia seorang yang mempunyai kedudukan terhormat di sisi Allah.

(Surah al-Ahzab: 69)

Maka Nabi Musa AS semakin bertambah yakin dan terhormat, bertambahlah kekuatannya dan bertambah juga kekukuhan dan keyakinannya terhadap ajaran Allah kerana dia benar-benar jujur. Sejak awal lagi dia telah mengetahui siapa yang berdusta.